

In questa trama, par el se habi interposto el consollo de' chatelani, el qual, ne li zorni prosimi pasadi, hanno avuto grande amicitia con il signor soldam, e quanto da lui el richiedeva, tanto opteniva. *Tamen* per l'avegnire fursi, fursi non sarà ben per lui. Io *sum* per stare sopra la mia opinion vecchia, che è, credo, che ad ogni modo la fine sua habi a esser chativa et dolorosa. Or, per tornare al prefato, a di 22 fevrer, fosemo chiamati tuti in castello, si damaschini, come alexandrini, el si credeva aver la deliberation, e tanto puj che el signor d' Alepo e Marsala, con altri armiragij, era per domandare al signor soldam, di gratia el ne liberase; e cusi ogniuno se persuadeva, perchè l'ordine era dato, et in castello cusi da molti ne fo dito, ancora che el sia seguito el contrario. Fosimo nuj prima li chiamati, ma per Tangavardin ne fo fato tornar indriedo, al qual segno schemenzai a dir, io me dubito. Se haspetò un pochetto. In quel *interim* el fo menado per Tangavardin, davanti el signor soldam, quei che fo atrovati al Bir con le letere del Sofi. Subito el fu chiamato el magnifico consollo de Damasco e suo' marchadanti, dai quali ho intexo, come l'uxò parolle un pocho alte, e questo per confidarsi in quei armiragij che era li prexenti, persuadendose e standose certo dover haver la liberation; *tandem* el dito consollo con suo' marchadanti fono tuti mesi in chadena, salvo sier Almorò di Priuli, per esser un pocho agravato di febre, non si atrovò in loro compagnia. Et poi fosimo nuj chiamati, che Idio avese voluto fosemo stati i primi! perchè el nostro magnifico consollo, huxava parole dolce, dico cusi, come porta la condizion del paexe; ma per questo non restò che ancora nuj non fosemo mesi in chaena, ma sua magnificentia non; et apreso fo meso sier Andrea Morexini et sier Octavian Bon, che, come favori' del signor d'Alepo, andavano per la terra dove li piaceva. In verità, se non era la praticia de questo Morexini con el signor d' Alepo, tutj crede non sarebe stato tanto mal. Ma, hase dito, el soldam, de questo à 'budo grande sdegno, perchè questo signor è di sorta che 'l non compiaxe tropo a' suo' armiragij, et di loro ne vedo far poco conto; el qual armiragio, a li giesti et modi di parole, si vedeva, cerchava pur di cavarne qualche pochetto, non ge valse. El signor soldam, nel fin del suo parlar, dise, *coram populo*: Consolj, siatj insieme con vostri marchadantj e fatime bon cuor; e questo fo puj d' una volta, et cusi in chadene se ne vegnisimo a caixa de Nadracas, e poi a casa nostra, che stiamo pur in caixa de Nadracas; e damaschini, al brunir de la sera, se ne handò a la sua abitation;

ma per molti zorni stesemo su diverse dispute e contrasti tra nuj, fazendo varij judicij, quel che indichava far bon cuor al soldam. A di 3 marzo, li do consolj montò in castello a l'audientia secreta, *tamen* non si potè far altrimenti. I nostri consoli diseno assai; ma non starò a tediarvi di proposte e risposte; *unum* me par, che de parole el soldam fu raxonevolmente, secondo i andamenti del paixe, dicendo, che l'aveva a grato che stasemo nel suo regno, ma che ancora luj voleva la sua reputation fose persalvata, e che del Sofi el non ne voleva parlar puj; e poi el vene sopra i capitolj, e sopra quei el ne fo parlato longamente, e lui sempre dicendo, che li avevemo rotj, et che el vuol formar nuovi capitolj, e molte volte commemorò i capitoli vecchi; e foli ditto, per li prefati consoli, che tuto quello che podeva husir di le suo mano, che tanto erano per far. El soldam li dise, chè el li manderia, quel che el voleva, in nota. Ancor non si à avuto cosa. Missier Piero Zen li domandò che el fose chavato de chadene, luj li dise, quello era niente a quel che era per aver. Non ne fo altro per quel zorno, et se ne vene a caixa, et ancor se troviamo in chadene, ma de note dormimo senza, et ancora de zorno poco le portiamo, et se atroviamo a custodia de quatro Cima, serati in una caixa, e da molte bande intendiamo, come el soldam vuol remi, baxilischj, bonbarde e galie. Tangavardin dice, che, a Venexia, li fo promeso molte di queste cose. Le letere, che la illustrissima Signoria al signor soldam et al chadi Nadracas, quella del cadì subito, per el magnifico consolo, li fu apresentata, digando, che quella del soldam la illustrissima Signoria cometeva a sua magnificentia, che si per sorta el si atrovase al Cairo, luj la dovese apresentar. E questo si faceva per certo parlar con el soldam, el qual subito el chadi Nadracas feze lezer la sua letera. El signor soldam subito montò in colora grandissima, dizendo che cosa scriveno costoro, del mal rispondere de le spezie, de captivi gabulj de doane, et esso signor soldam non vuolse la sua letera, che quello illustrissimo stado li scrive, la qual letera è ancor apreso de nuj. Altro non potemo fare. Stiamo a speranza de Dio; luj sa quando sarà el nostro spatio, chè nuj non lo potemo intender; la gratia del qual priego, che prometi el sia presto. Credete che alcune volte se ritroviamo in malla disposition, per non saper quel che voglia questo signor soldam. Danari, fino a qui, me par non voler, ma ben credo che, per sua reputation, l' averia a grato uno horatore da Venexia, che fosse qualche dignissima persona e di gran re-